

幸魯盛典

卷九 卷十



幸魯盛典卷九

上以次觀漢永壽二年韓勅造禮器碑漢永興二年諸

郡史孔謙碑魏黃初元年宗聖侯孔羨碑

附錄○漢永壽二年魯相韓勅造立禮器碑其文

曰維永壽二年青龍在涪灘碑作歎古霜月之靈

皇極之日魯相河南京韓君追惟太古華胥生皇

缺一顏缺一育缺一寶俱制元道百王不改孔子

近聖為漢定道自天王以下至於初學莫不驥疑古

慨思嘆仰師鏡顏氏聖舅家居魯親里元官聖妃

在安樂里聖族之親禮所宜異復顏氏元官氏邑

中繇發以尊孔心念聖歷世禮樂陵遲秦項作亂  
 不尊圖書倍道畔德離敗聖輿食糧亾於沙丘君  
 於是造立禮器樂之音符鐘磬瑟鼓壘碑作雷古  
字省文  
 洗觴觚爵鹿俎豆籩杞音凡禁壺脩飾宅廟更作二  
 輿朝車威熹宣杼元汙以注水流法舊不煩備而  
 不奢上合紫臺稽之中和下合聖制事得禮儀於  
 是四方士人碑作仁古  
與人通聞君風耀敬咏其德尊琦  
 大人之意卓彌之思乃共立表石紀傳億載其文  
 曰皇戲古與義  
字通統華胥承天畫卦顏育空桑孔制  
 元孝俱祖紫宮太一所授前闔古開  
字九頭以升言

教後制百王獲麟來吐制不空作承天之語乾元  
 以來三九之載八皇三代至孔乃備聖人不世期  
 五百載三陽吐圖二陰出讖制作之義以俟知與  
 於穆韓君獨見天意復聖之族卓越紀思脩造禮  
 樂胡輦器用存古舊宇慇懃宅廟朝車威熹出城  
 造作漆不水解工不爭賈深除元汙水通流注禮  
 器升堂天雨降澍百姓訢和舉國蒙慶神靈祐誠  
 竭敬之報天與厥福永享年壽上極華祀旁脩碑  
作  
攸古字皇代刊石表銘與乾輝耀長期蕩蕩於盛  
省文復授赫赫罔窮聲垂億載

臣按永壽桓帝紀年也桓帝永興三年正月戊申  
改元永壽明年丙申曰歲在涪灘也霜月之靈皇  
極之日歐陽修云疑是九月五日也碑正面及碑  
陰俱列姓名出錢若干韓明府名勅字叔節勅音  
賚與勞徠之徠同答勤曰勞撫至曰勅示有節也  
故字叔節

魏立孔子二十一世孫美爲宗聖侯碑其文曰維  
黃初元年大魏受命亂軒轅之高蹤紹虞氏之遐  
統應曆數以改物揚仁風以作教於是揖讀五瑞  
班宗彝鈞衡石同度量秩羣祀於無文順天時以

布化旣乃緝熙聖緒昭顯上世追存二代三恪之  
禮兼紹宣尼褒成之後以魯縣百戶命孔子廿一  
世孫議郎孔羨爲宗聖侯以奉孔子之祀制詔三  
公曰昔仲尼負大聖之才懷帝王之器當衰周之  
末而無受命之運缺二字乎魯衛之朝教化乎洙泗  
之上栖栖焉皇皇焉欲屈已以存道貶身以救世  
於是王公終莫能用乃退考五代之禮修素王之  
事因魯史而制春秋就太師而正雅頌俾千載之  
後莫不采其文以述作仰其聖以成謀咨可謂命  
世大聖億載之師表者已遭天下大亂百祀墮壞

舊居之廟毀而不脩衰成之後絕而莫繼闕里不聞講誦之聲四時不睹烝嘗之位斯豈所謂崇化報功盛德百世必祀者哉嗟乎朕甚閔焉其以議郎孔美爲宗聖侯邑百戶奉孔子之祀令魯郡脩起舊廟置百石吏卒以守衛之又於其外廣爲屋宇以居學者於是魯之父老諸生遊士睹廟堂之始復觀俎豆之初設嘉聖靈於髣髴想貞祥之來集乃慨然而嘆曰大道衰廢禮學滅絕卅餘年皇上懷仁聖之懿德兼二儀之化育廣大苞於無方淵深淪於不測故自受命以來天人咸和神氣烟

燼嘉瑞踵武休徵屢臻殊俗解編髮而慕義遐方越險阻而來賓雖太皞遊龍以君世虞氏儀鳳以臨民伯禹命元宮而爲夏后西伯由岐社而爲周文尚何足稱於大魏哉若乃紹繼微絕興脩廢官疇咨稽古崇配乾坤况神明之所福祚宇內之所歡欣豈徒魯邦而已哉爾乃感殷人路寢之義嘉先民泮宮之事以爲高宗僖公蓋嗣世之王諸侯之國耳猶著德於三頌騰聲於千載况今聖皇肇造區夏創業垂統受命之日曾未下輿而褒美大聖隆化如此能無頌乎乃作頌曰煌煌大魏受命

溥將繼體黃虞含夏苞商降釐下土上清三光羣  
祀咸秩靡事不綱嘉彼元聖有邈其靈遭世霧亂  
莫顯其榮褒成旣絕寢廟斯傾闕里蕭條靡歆靡  
馨我皇悼之尋其世武乃建宗聖以紹厥後脩復  
舊堂豐其費宇莘莘學徒爰居爰處王教旣新羣  
小過沮魯道以興永作憲矩洪聲登假神祇來和  
休徵雜遘瑞我邦家內光區域外被荒遐殊方慕  
義搏拊揚歌於赫四聖運世應期仲尼旣没文亦  
在茲彬彬我后越而五之垂於億載如山之基

臣按此碑張稚圭以爲曹植撰詞梁鵠書鍾繇刻

又於門左觀漢建寧二年史晨祀廟碑漢永壽三  
年韓勅脩墓碑及漢泰山都尉孔宙博陵太守孔  
彪墓碑

附錄○魯相史晨奏出王家穀祀孔子廟碑其文  
曰建寧二年三月癸卯朔七日巳酉魯相臣晨長  
史臣謙頓首死罪上尚書臣晨頓首頓首死罪死  
罪臣蒙厚恩受任符守得在奎婁周孔舊寓不能  
闡弘德政恢崇壹變夙夜憂怖累息屏營臣晨頓  
首頓首死罪死罪臣以建寧元年到官行秋饗飲  
酒泮碑作泮古字通宮缺一復禮孔子宅拜謁神坐仰瞻

三會盛典 卷九 五  
棖桷俯視几筵靈所馮依肅肅猶存而無公出酒  
脯之祠臣卽自以俸錢脩上案食醜具以敘小節  
不敢空謁臣伏念孔子乾坤所挺西狩獲麟爲漢  
制作故孝經援神契曰元丘制命帝卯行又尚書  
考靈耀曰丘生蒼際觸期稽度爲赤制故作春秋  
以明文命綴記撰書脩定禮義臣以爲素王稽古  
德亞皇代雖有褒成世享之封四時來祭畢卽歸  
國臣伏見臨辟雍日祀孔子以太牢長吏備爵所  
以尊先師重教化也夫封土爲社立稷而祀皆爲  
百姓興利除害以祈豐穰月令祀百辟卿士有益

於民矧乃孔子元德煥炳光於上下而本國舊居  
復禮之日闕而不祀誠朝廷聖恩所宜特加臣寢  
息耿耿情所思維臣輒依社稷出王家穀春秋行  
禮以共禋祀餘胙賜先生執事臣晨頓首頓首死  
罪死罪臣盡力思惟庶政報稱爲效增異輒上臣  
晨誠惶誠恐頓首頓首死罪死罪上尚書 時副  
言太傅太尉司徒司空大司農府治所部從事  
昔在仲尼汁光黑帝曰汁光紀之精大帝所挺顏母毓靈  
承敝遭衰黑不代蒼轍環應聘嘆鳳不臻自衛反  
魯養徒三千獲麟趣作端門見徵血書著紀黃玉

韻音響應主為漢制道審可行乃作春秋復演孝經  
 刪定六藝象與天談鈎河摘雒却揆未然巍巍蕩  
 蕩與乾比崇○其碑陰云相河南史君諱晨字伯  
 時從越騎校尉拜建寧元年四月十一日戊子到  
 官乃以今日拜謁孔子望見闕觀式路虔跪既至  
 升堂屏氣拜手祇肅屑僂髣髴若在依舊宅神  
 之所安春秋復禮稽度元靈而無公出享獻之薦  
 欽因春饗導物嘉會述脩辟雍社稷品制即上尚  
 書參以符驗乃敢承祀餘昨賦賜刊石勒銘并刻  
 本奏大漢延期彌歷億萬○時長史廬江舒李謙

敬讓五官掾魯孔暢功曹史孔淮戶曹掾薛東門  
 榮史文陽馬琮守廟百石孔讚副掾孔綱故尚書  
 孔立元世河東太守孔彪元上處士孔哀文禮皆  
 會廟堂國縣員缺一吏無大小空府竭寺咸俾來  
 觀并泮宮文學先生執事諸弟子合九百七人雅  
 歌吹笙考之六律八音克諧蕩邪反正奉爵稱壽  
 相樂終日於穆肅雝上下蒙福長享利貞與天無  
 極○史君饗後部史仇誦縣吏劉耽等補完里中  
 道之周左牆垣壞決作屋塗色脩通大溝西流一  
 字里外南注城池恐縣吏斂民侵擾百姓自以城



池道濡

古壩字

麥給令還所斂民錢材

古財字通用

○史

君念孔瀆顏母井去市遼遠百姓酷買不能得香酒美肉於昌平亭下立會市因彼左右咸所願樂○又勅瀆井復民飭治桐車馬於瀆上東行道表南北各種一行梓○假夫子冢顏母井舍及魯公冢守吏凡四人月與佐除

臣

按漢元嘉永壽建寧及魏黃初碑各缺數字餘皆完好可讀至永壽三年脩墓碑乃魯相韓勅脩孔子墓碑也碑陰載輸錢人名及孔子塚下復民吳仲初等十餘人字差可辨歐陽脩錄林廟漢碑

皆有跋尾此碑獨無則在宋時已無完本其碑在墓前久仆地今移置同文門又漢泰山都尉孔宙碑文云宙字季將孔子十九世孫北海相融之父漢博陵太守孔彪碑文云彪字元上孔子十九世孫潁川君之元子蓋魯相晨碑所云河東太守孔彪元上者也與漢諸郡史孔謙碑皆自林中移至同文門宙碑點畫完者尚多彪謙二碑剝落不可次第

上闕碑竟問門外尙有古蹟否孔尚任奏曰前仰高門有璧水一曲無源易涸若導城東文獻泉西北入

三會盛典 卷九  
城以注之斯璧水常盈藻芹有託但未奉

明旨不敢疏鑿

上曰此有何妨顧大學士王熙曰衍聖公孔毓圻等所奏曲阜城外泉水既不關係運河著准其開通入城交與該撫遵行

駕自同文門回閱洪武永樂碑復由奎文閣東偏門入觀宋金元脩廟碑行數武

問廟基廣濶何處是先師故宅衍聖公孔毓圻奏曰皇上所御講筵之後有魯壁遺址乃先師燕居之所復入承聖門觀堂前太初石唐槐及銀杏樹由中階

升詩禮堂衍聖公孔毓圻奏曰此當日夫子獨立伯魚趨庭得聞詩禮之處

附錄○詩禮堂初名壽堂藏夫子衣冠車服禮器諸儒講禮飲射於中舊制甚狹宋真宗幸闕里改建駐蹕便殿帝還次兗州有司奏令撤毀命去鴟吻爲孔氏延賓齋於東偏別設屋以藏禮器○李東陽詩禮堂銘云闕里孔廟之東有詩禮堂蓋舊名也嘗聞故衍聖公弘泰言金章宗謁廟時爲行幄以駐蹕比去有司請撤之章宗云留孔氏爲延賓齋遂止勿撤近毀於火今稍移而東南數武許

幸會盛典 卷九 九  
加崇廣焉因爲銘以遺今衍聖公聞韶俾識之銘  
曰惟孔有庭聖訓攸在父立子過其徒是賴其訓  
維何維詩及禮手所剛定教自家始聖不可作庭  
名固存萬世是師矧惟子孫有齋延賓金所駐蹕  
新廟旣闢新堂亦遷有來繩繩世守勿愆○太初  
石在詩禮堂前高丈餘唐槐在其傍又銀杏一株  
亦千餘年樹也

臣按詩禮堂藏車服禮器祥符明昌皆於此駐蹕  
恭逢我

皇上臨幸設

黃幄

御講筵端拱穆若威顏下霽論說從容觀聽竦肅

皇上周視廟庭凡三履其地徘徊慨慕有無窮之思而  
臚唱班聯之盛都俞拜颺之隆皆在此堂千載而  
下聞風贊嘆況生逢其會者乎今恭懸

聖諭於上而奉萬世師表碑石立於中

聖謨

祖訓咸式臨焉登茲堂者益肅然起敬而仰頌

聖澤之宏深無盡矣

上於堂後觀孔宅遺井憑欄歎羨衍聖公孔毓圻奏曰

此臣祖當年所飲之井也

上命汲水嘗之

附錄○夫子舊宅在大成殿之東偏宅大一頃今毓粹門外南向小門夫子舊宅門也井在詩禮堂後明兗州府知府童旭護以石欄

上問魯壁遺址孔毓圻奏曰昔秦始皇焚詩書臣九世

祖孔鮒預藏尚書論語孝經諸書於壁中至漢魯

恭王欲毀臣祖故宅以廣其宮聞壁中有金石絲

竹之聲發之得竹簡古文故後世名其堂曰金絲

附錄○明李東陽金絲堂銘曰金絲堂舊在孔廟

左廡之東東直井前直詩禮堂嘗掘地得石刻知為孔子故宅蓋世所傳魯恭王聞金石絲竹之聲者也故歷代之樂器藏於其間比者廟燬而堂猶存新廟之闢堂地皆入左廡金絲則移而西與詩禮堂正相直東陽既為篆額復為銘金絲之銘曰惟孔有宅曰惟聖門魯恭何人欲壞更存維壁有書四代之文維堂有聲八音是聞此事茫昧書則真有有堂載新宅固其舊聞樂知德斯言已久金絲在焉名不可朽昔堂在東今堂在西欲究厥初觀我銘詩

上顧衍聖公孔毓圻曰爾家古蹟看完未毓圻等奏曰  
先聖遺蹟湮沒已多不足當

皇上御覽但經

聖恩一顧從此

祖廟增輝書之史冊傳之萬世仰頌

皇上尊師重道匪直臣一家之榮幸大學士王熙翰林

院學士孫在豐侍講學士高士奇咸跪奏曰毓圻

言是

上微笑領之又登詩禮堂升

御幄衍聖公孔毓圻等出候承聖門外

上取

聖製過闕里詩

命大學士王熙捧出

賜衍聖公孔毓圻等跪接展讀

詩載第一卷 讀畢

咸叩頭謝

恩奏曰從古帝王過闕里惟唐明皇有詩一章不過感

慨嗟歎之言竝無尊崇聖學之意伏覩

御製新詩超今軼古景仰聖道不啻羹牆臣家何幸膺

茲

寵錫臣謹奉為子孫世世永寶羣臣咸曰

天章睿藻雲漢昭回洵非開元一詩所可幾及也

附錄○唐明皇過魯祭孔子廟而歎之詩云夫子何爲者栖栖一代中地猶鄆氏邑宅卽魯王宮歎鳳嗟身否傷麟怨道窮今看兩楹奠當與夢時同○張說應制奉和詩曰孔聖家鄒魯儒風藹典墳龍驂過舊宅鳳德詠餘芬入室神如在升堂樂自聞懸知一王法今日待明君張九齡應制詩曰孔門泰山下不見登封時徒有先王法今爲明主思恩加萬乘幸禮致一牢祠舊宅千年外光華今在茲

以下并附歷代孔氏世裔承恩奏對事畧○漢孔安國明達淵博雅

學絕倫少學詩於申公受尚書於伏生長則博覽經傳問無常師年四十爲諫議大夫雖與羣臣並參侍武帝爲侍中見待崇禮遷博士後魯恭王壞孔子故宅於壁中得古文虞夏商周之書及傳論語孝經乃不壞宅悉以書還孔氏安國承詔作書傳又著古文孝經論語訓解○孔霸治尚書漢昭帝時爲博士宣帝時爲大中大夫以選授皇太子經遷詹事爲高密相元帝卽位徵拜太師賜爵關內侯食邑八百戶號褒成君賜黃金二百斤第宅一區徙名數於長安霸上書求奉先聖祠詔令以

所食邑祀孔子故霸子福名數於魯奉孔子祀○  
孔光霸少子漢成帝時爲光祿勳領尚書凡典樞  
機十餘年守法度脩故事上有所問據經法以心  
所安而對時有所言輒削藁以爲章主之過以干  
忠直人臣大罪也有所薦舉惟恐其人知之沐日  
歸休兄弟妻子燕語終不及朝省政事或問光溫  
室省中樹皆何木也光默不應更答以他語平帝  
年少太后稱制徙爲太師稱疾辭位太后詔曰太  
師光聖人之後先師之子德行純淑道術通明居  
四輔職輔帝於道今年耆有疾其令太師毋朝十

日一賜餐賜太師靈壽杖光凡爲御史大夫丞相  
各再一爲大司徒太傅太師歷三世居公輔前後  
十七年○孔僖與崔駰因遊太學習春秋隣房生  
梁郁陰上書告駰誹謗先帝刺譏當世事下有司  
駰詣吏受訊僖以吏捕方至恐誅乃上書自訟詣  
闕待罪詔勿問拜僖蘭臺令史元和二年春帝東  
巡狩還過魯幸闕里僖因自陳謝帝曰今日之會  
寧於卿宗有光榮乎對曰臣聞明王聖主莫不尊  
師貴道今陛下親屈萬乘辱於敝里此乃崇禮先  
師增輝聖德至於光榮非所敢承帝大笑曰非聖

者子孫焉有斯言遂拜僖郎中詔從還京師使校書東觀○孔損爲褒成侯漢章帝東巡狩損助祭○唐孔穎達太宗朝爲文學館學士封曲阜縣男轉給事中數以忠言進帝問孔子稱以能問於不能以多問於寡有若無實若虛何謂也對曰此聖人教人之謙耳已雖能仍就不能之人以容所未能已雖多仍就寡少之人更容其多內有道外若無中所實容若虛非特匹夫君德亦然若其據尊極之位銜聰輝明恃才以肆則上下不通君臣道乖自古滅亾莫不由此也帝稱善除國子監司業

歲餘以太子右庶子兼司業與諸儒議曆及明堂事多從其說皇太子令穎達撰孝經章句因文以盡箴諷帝知數爭太子失賜黃金一斤絹百疋久之拜祭酒侍講東宮帝幸太學親釋奠命穎達講經畢上釋奠頌有詔褒美穎達先與顏師古司馬才諸儒受詔撰定五經義訓凡一百八十卷名曰五經正義太宗降詔曰卿等博綜古今義理該洽考前儒之異說符聖人之幽旨實爲不朽付國子監施行賜穎達物三百段○五代孔仁玉九歲通春秋爲人嚴整臨事有斷後唐明宗長興元年爲



曲阜主簿三年遷龔丘令龔文宣公晉高祖天福五年改曲阜令後周太祖廣順二年幸曲阜拜孔子廟及墓召仁玉賜五品服復以爲本縣令○宋孔宜舉進士不第乾德中詣闕上書述其家世詔以爲曲阜主簿歷遷司農寺丞掌星子鎮市宜上言星子當江湖之會商賈所業請建爲軍詔以爲縣就命宜知縣事後以爲南康軍宜代還獻文賦數十篇太宗覽而嘉之名見問以孔子世嗣謂左右曰家世之遠有如此者乎因下詔曰素王之道百代所崇傳祚襲封抑存典制文宣王四十四代

孫司農寺丞宜服勤素業砥礪廉隅承歷官聯洽聞政績聖人之後世德不衰俾登朝倫以光儒胄可太子右贊善大夫襲封文宣公復其家太平興國八年詔脩曲阜孔子廟宜貢方物爲謝詔褒之宜弟勗進士及第歷官五十年博學能文尤工於詩任曲阜縣令初真宗東封謁廟求孔氏子孫令主廟事有司言勗卽文宣公宜之弟謹愿可任詔以殿中丞知仙源縣兼檢校先聖廟賜緋魚袋後以工部侍郎告老○孔延世爲許州長葛令至道三年真宗諭侍臣令訪先聖子孫呂端奏有世嫡

延世見任長葛令宣赴闕詢以家門故事授曲阜令襲封文宣公制曰叔敖陰德尚繼絕於楚邦臧孫立言猶有後於魯國豈聖人之後可獨遠於陵廟許州長葛令孔延世鍾裔孫之慶仕文理之朝能敦素風甚有政術宜在桑梓之地以奉烝嘗之儀上親諭之曰汝宜精心以典祖廟無惰面賜白金束帛及太祖御書并九經書延世子聖祐景德初始九歲賜同學究出身大中祥符元年東封泰山特賜聖祐衣綠陪位綴京官班還至兗州幸曲阜擢爲太常寺奉禮郎後襲封文宣公改名祐又

錄其近屬進士渭同三傳出身習進士延佑習學究延渥延魯延齡竝同學究出身共賜銀一百兩絹三百疋以充奉祠廟延魯大中祥符五年復舉進士及第後改名道輔爲御史中丞○孔宗翰知仙源縣爲治有條理王珪司馬光上章論薦由通判知虔州時章貢兩江歲爲水齧宗翰伐石爲址冶鐵錮之由是屹然詔書褒美哲宗初立求言吏民上書以百數詔司馬光閱其可用者十五人獨稱獎其二乃宗翰王鞏也元祐初詔爲司農少卿遷鴻臚卿言孔子之後自漢以來有褒成奉聖宗

聖之號皆賜實封或縑帛以奉先祀至於國朝益加崇禮真宗東封臨幸賜子孫世襲公爵然兼領他官不在故鄉於名爲不正請自今襲封之人使終身在鄉里詔從之改衍聖公爲奉聖公不領他職給廟學田萬畝賜國子監書立學官誨其子弟○元孔思晦資質端敏受業於導江張頊講求義理舉茂材爲范陽寧陽兩地教諭於是族人議思晦適長且賢宜襲封爵奉祀事狀上政府未決仁宗在位雅尚儒道一日問孔子之裔今幾世襲爵爲誰廷臣具對曰未定帝取孔氏譜牒觀之曰以

嫡襲封者思晦也復奚疑特授中議大夫襲封衍聖公月俸一百緡加至五百緡賜四品印泰定三年山東廉訪使王鵬南言襲爵上公而階止四品弗稱且失尊崇意明年陞嘉議大夫至順二年改賜三品印○孔克堅至元時授嘉議大夫襲封衍聖公至正八年朝廷謂公爵與階不稱制授中奉大夫賜以銀章十五年平章薦克堅明習禮儀徵爲同知太常禮儀院事攝太常卿遂拜治書侍御史辭歸拜山東廉訪使又辭會山東亂北行抵藁城召入爲直賢學士十九年遷禮部尚書國子祭

酒謝病歸有明定鼎太祖屢詔促入覲待以賓禮而不名賜廩祿慰勞甚至郊社必致膳肉上嘗謂曰爾有福快活人也政事不以煩爾○明孔希學朝謁行在太祖問民利病希學條對有序上甚嘉納賜雜絲六端命回守祖庭歲入覲始至中使慰勞賜予稠疊館餽至僕隸累勅禮部用意禮待歲旦朝賀班亞上相○孔訥丁父憂以馬后喪赴京祭陵既竣事入覲太祖顧謂廷臣曰孔訥真聖人子孫也賜膳光祿命館於太學遣尚書劉仲質勞問日繼庖廩賜衣物鈔錠將使襲封以居喪辭乃

止服除朝京師上喜命禮官擇日授爵拜命之日大廷百僚班列勅教坊樂送至太學學官率諸生二千餘人迎於成賢街初行誥詞吏部請用資善階上曰旣爵公勿事散官但誥以織文玉軸爲異耳遂爲故事○孔涇仕元爲翰林簡閱洪武時以公事至京師上問襲封與世職相應典故衆皆失常涇獨出班應對敷奏詳明上喜賜燕及楮幣及回賜藤柺遣吏部尚書王昂賚勅諭之曰到家好生管理族屬務要遵守祖訓著將這柺令後世子孫以爲故事○孔彥縉其名仁宗爲太子監國時

所命也永樂八年襲封年尚幼成祖觀其言動進退從容喜謂侍臣曰真聖人裔也館之太學禮待甚厚洪熙元年賜第於東安門北景泰二年視學陪祀賜三臺銀印玉帶織金麒麟服○孔諤永樂六年舉人明年會試副榜第一時太宗行在北京仁宗以太子監國事謂近臣曰我朝孔子子孫未有出仕者今有此一人何不取進士對曰考試至公雖父子不容私吏部欲除諤教官仁宗召見曰孔諤少年偉俊務著中進士命冠帶送國子監肄業未幾左春坊左中允員缺仁宗顧謂東宮官曰

春坊中允幾品對曰正六品曰著孔諤做教皇子諸王賜宅一區及器皿諸物諤嚴正不阿後轉大理評事改監察御史○孔弘緒年八歲景帝遣使驛召之陛見之日賜冠服於東角門俾襲封爵弘緒進止應對如成人帝見其垂髫命中官卽廡下賜膳使歸遺母又賜玉帶以其軀小去二銖授之又賜金圖書印其文曰謹禮崇德念弘緒穉幼勅戒族人共保護之如有恃強挾長以陵害者許具實以聞令懸之公堂永爲法守命吏部特簡教授一員誨之天順丁丑英宗復辟弘緒入覲上召見

便殿親握其手置膝上與語久之賜白金綵帛以  
弘緒賜第湫隘易以大第凡南城賞花西苑較獵  
皆從親祀郊壇亦與分獻。孔公恂景泰朝進士  
比殿試聞母疾遂不入上知之問禮臣孔公恂何  
爲不入對禮臣具實以聞上曰聞疾未有訃音可  
召入對遣錦衣賚金牌召之比入日已晡矣試卷  
弗及備命禮官賜以紙筆恂條對詳明賜進士出  
身服闋擢禮科給事中天順癸未東宮缺左右詹  
事員上遂以孔公恂司馬恂超授少詹事拜命之  
日上入宮謂孝肅皇后曰朕爲爾子得二好先生

爾知喜乎后問爲誰上曰孔公恂聖人之後也司  
馬恂賢人之後也二人故家後裔且有才名斯授  
之耳后斂容謝懽宴樂作夜分始罷中貴喧傳以  
爲太平美事公恂在東宮講明聖學開陳善道輔  
導有成凡三入詹事稱名臣焉。孔弘泰入朝憲  
宗見所佩玉帶遣人問焉泰對曰臣家門故事累  
朝恩數不敢廢也再值郊壇上親定命爲分獻及  
辭歸上曰卿其進學循禮表率宗族無忝聖裔以  
副朕懷。孔聞韶襲爵方弱冠陞見儀度秀整稱  
上意面賜玉帶麒麟服兼賜制誥曰爾聞韶儒宗

正嫡嗣膺封命茂年美質足紹前休爾尚克勤進  
脩永終令譽以副四方之觀禮以光百代之宗祀  
武宗改元幸學禮成命坐彝倫堂聽講御賜回文  
詩以寵其行

臣毓圻按家傳漢時自褒成君霸至議郎昱歷東  
西京爲卿相牧守者五十三人列侯七人自後宗  
子之承恩賢達之遇主列朝具有不可勝載述其  
尤著若親幸闕里得膺寵眷者漢肅寧時爲臨晉  
令僖褒成侯損周太祖時爲曲阜令仁玉宋真宗  
時爲侍郎勗文宣公佑司諫道輔至於釋奠太學

講經上頌者則爲唐國子監祭酒穎達皆輝映家  
乘以爲美談然求其遭逢之異禮數之隆則未有

過於臣毓圻者臣襲爵時年甫十二卽蒙

皇上召入瀛臺

命坐賜茶問臣年幾何師事何人臣時應對多有失措

皇上曲賜涵容慰勞軫恤

德意優渥嗣後每歲入

朝必蒙

垂問嘗隨

御仗

皇上問臣家傳世緒

諭令嚮學臣自媿愚昧荒落無以仰答

聖恩今恭遇

鑾輿臨幸闕里親承

聖諭諄諄訓勉且獲侍

皇上歷覽

廟庭

天顏怡悅

溫旨優容凡有

顧問令臣從容奏對齋堂陛之威嚴等君臣於父子即

虞廷之都俞颺拜成周之來游來歌亦無以方斯

恩遇之隆匹此

寵光之渥也臣敢不夙夜黽勉訓導子姓相與策礪駑

鈍仰思

祖德以上答

聖恩於萬一耶



幸魯盛典卷九終

幸魯盛典卷十

聖駕出承聖門大學士王熙宣

諭曰

聖駕卽日幸孔林仍着衍聖公孔毓圻及口北道孔興

洪講書官孔尚鉉孔尚任引

駕於是

上由毓粹門出

御涼輦鹵簿前導經襲封第門

上謂衍聖公孔毓圻曰此爾家耶爾可進去恐人多擁

擠毓圻叩謝

駕遂東過鼓樓北從陋巷街出曲阜城北門萬姓喜見  
 天顏夾道懽呼有周公後裔東野沛然扶掖其父東野  
 雲鵬匍匐道左上疏請得以世官奉先廟如四氏  
 上曰周公姬姓爾疏稱東野何也沛然奏曰昔伯禽之  
 季子魚食采於東野因以為姓

上問周公廟何在沛然奏曰東望高阜松柏鬱然者即  
 魯公世廟也

上問曰此老人誰也沛然奏曰臣父東野雲鵬年七十  
 有五特來瞻仰

天顏

上曰爾族衆幾何沛然奏曰族人不及百丁

上覽奏訖付侍衛交部即議前行一里至聖林門

命從臣皆下馬又半里入觀樓門衍聖公孔毓圻等跪  
 迎道左

上顧笑曰爾等已先到此耶毓圻奏曰臣等從間道先

來伺候

駕至洙水橋即

命降輦毓圻奏曰此去

先師墓尚遠又引

駕前至墓門

上升輦步入詣

先師墓前北面跪大學士明珠捧金椀酒

上三酌酒畢行三叩頭禮恭親王及諸大臣衍聖公孔毓圻等皆陪位行禮

附錄○先聖林在今縣城北二里許背泗面洙林門直縣北門夾道檜樹林地圍徑數里繚以周垣林中無荆棘鳥巢古木千章多有莫能名者○禮記檀弓孔子之喪有自燕來觀者舍於子夏氏子夏曰聖人之葬人與人之葬聖人也子何觀焉昔者夫子言之曰吾見封之若堂者矣見若坊者矣

見若覆夏屋者矣見若斧者矣從若斧者焉馬鬣封之謂也今日而三斬版而已封尚行夫子之志乎哉○史記孔子葬魯城北泗上弟子心喪三年相訣而去子貢廬於塚上凡六年弟子及魯人從而家者百餘室魯世世相傳以歲時奉祀孔子○王充論衡曰孔子當泗水而葬泗水爲之卻流○皇覽曰孔子塚去魯城一里塚塋百畝塚南北廣十步東西廣十三步高一丈二寸如鳥卵馬鬣今增周圍五十步高一丈五尺塋中不生荆棘刺人草樹以百數皆遠方弟子各持鄉土異種所植

惟楷木爲多餘則柞枌雜離女貞五味龜檀之木也。○先聖沒弟子於塚前以瓠鬻爲壇方六尺至漢永壽元年魯相韓勅易之以石方三尺縱橫各七石上刻出錢人姓名今猶隱隱可見墓前一室東向相傳子貢廬墓處也外有塙垣環之墓之東南爲享殿三間殿前翁仲二左執笏右帶劍石麟石虎四華表二漢永壽元年魯相韓勅建殿之前有門三間門之左爲思堂壁上石刻唐宋時物也有宋真宗駐蹕亭門之前爲洙水水上有橋橋東有輦路路南爲觀樓樓在周垣之上魯故北城也

樓南爲林坊扁曰宣聖林坊之前爲大石坊五洞鐫萬古長春四字萬曆二十二年建。○孔聖全書曰孔子葬魯城北公西赤爲識注云識音誌後世墓誌之祖。○伯魚墓在先聖墓東稍南相去僅數步墓前有碑鐫泗水侯墓孔子商人蓋尚右也。○子思子墓在先聖墓南相去數十步墓前有碑鐫沂國述聖公墓。○漢桓帝永壽三年魯相韓勅脩孔子墓復民吳仲初等若干家給掃除。○靈帝建寧二年魯相史晨置夫子守冢吏四人。○宋文帝元嘉十九年詔曰昔之賢哲及一介之善猶或衛

其土壠禁其芻牧況尼父德表生民功被百代而  
墳塋荒蕪荆棘弗剪可蠲墓側數戶以掌灑掃并  
栽種松柏六百株○後魏孝文帝太和十九年幸  
魯城命兗州起圍栽柏脩飭墳壠○唐明皇開元  
十三年給近墓五戶灑掃懿宗咸通四年給灑掃  
五十戶○周太祖廣順二年幸林拜奠勅所屬以  
時脩葺墓所祠宇○宋真宗大中祥符元年帝拜  
文宣王墓給近便十戶以奉塋域○真宗幸孔林  
以林木擁道降輿乘馬以後馳道遂名輦路皆贅  
以石○兗州府誌曰洙水出泰山蓋縣臨樂山西

南流於卞城西泗水亂流至魯縣東北分爲二水  
西北流至孔里又南經瑕丘城東而南入石門又  
西南經平陽縣又南洸水注之洸水出東平上受  
汶水於岡縣西闡亭西南流經盛鄉城又南經寧  
陽縣城西又東南流注於洙水按瑕丘石門今府  
城東金口壩也○明世宗嘉靖二年御史陳鳳梧  
重脩洙水橋創建洙水石坊三架

臣按魯哀公葬孔子於魯城北泗上卽所居之堂  
立廟歷代致祭咸在廟庭罕有幸林者唯周太祖  
詣林再拜勅禁樵採宋真宗親降鑾輿與嗟展敬

三會盛典 卷十 五  
寂寥千祀遐哉尚矣雖松楸動色猶存馳道之碑  
而典冊靡徵莫悉當時之禮

皇上釋奠告成勾陳式道撫故封於馬鬣愾遺表於龍  
蹲降

輦徐行備爵登拜

聖心致慤

聖容有嚴頓使幽壤一杯酌沃

上尊之醞清洙一曲周環七萃之屯宜乎臣庶師儒之  
感頌詠歌不能自已也

上瞻仰墓碑問墓上是何草木衍聖公孔毓圻奏曰孔

林草木皆當年羣弟子各自其國徙植種類繁多  
不能悉辨其最著楷木蒼草二種

上問楷木何所用之毓圻奏曰楷木可爲杖又可爲棋  
其萌可爲蔬又可爲茶其瘦可爲瓢其子榨油可  
爲膏燭

附錄○墓碑書大成至聖文宣王墓永嘉黃養正  
書○楷木縱橫有紋可爲手板及杖宋濂楷杖銘  
云托根兮孔林有紋橫橫兮如玉如金千載寂寥  
兮孰白爾扶持之心又銘曰生孔林承聖澤文庚  
庚光繹繹扶顛持危資爾德○楷木一名文木唯

孔林及南海有之

上又問有著草否取來朕看衍聖公孔毓圻自墓側取  
著草一莖進呈

御覽

上曰大衍之數五十其用四十有九著草一叢五十莖  
者以筮方驗今果有否毓圻奏曰林中雖多著草其  
叢生五十莖者謂之瑞草不能常有今蒙

鑾輿經過瑞草必生有則臣卽馳進

附錄○洪範五行曰著之爲言耆也百年一本生  
百莖此草木之壽亦知吉凶者聖人以問鬼神○

逸禮曰天子之著九尺諸侯七尺士三尺○淮南  
子曰上有叢著下有伏龜○說文曰著蒿屬也生  
千歲三百莖可以爲卜策○著草唯產伏羲陵及  
孔子墓乃靈

上由聖墓西偏至先賢端木賜廬墓處有奉祀生端木  
植端木謙跪廬外上疏請得比四氏以博士侍祠  
上問子貢後人何以在此衍聖公孔毓圻奏曰委係端  
木嫡支今奉此處香火

上覽奏畢手付侍衛

附錄○廬墓處在聖墓西南後人建堂其上

上過宋真宗駐蹕亭徘徊良久

命侍衛登高遠眺

臣按真宗駐蹕亭在聖墓東南相傳真宗奠謁畢

坐此地宣兩府及兩制賜茶見墓傍古碑命詞臣拂藓辨認此其處也我

皇上躬親至此徘徊憑眺既而衍聖公孔毓圻請建

皇上駐蹕亭以紀隆遇今建於古亭之南雖

聖德峻極不藉土木之崇閱

神功巍煥不假雕鏤之飾美而氣象崢嶸俯窺前製丹

青炳蔚遠蓋舊觀矣

上見樹上蔓草

親摘一葉問此草何名衍聖公孔毓圻奏曰此名文草

冬夏不凋根葉花實具五色五味

附錄○文草生聖墓上蔓生柔細如絡石葉出似

十字冬夏不凋深秋結子纍纍五色具五味得五

行之正也

上至楷亭衍聖公孔毓圻奏曰此端木賜手植楷木枯

而不朽後人建亭其傍

附錄○古楷在聖林東南享殿後高四丈五尺圍

一丈枯而不朽水經注孔子既葬弟子異國各持



其土所宜植於墓前此蓋子貢植也

上又問有著草生地上者可更覓一觀衍聖公孔毓圻  
遂引

駕至楷亭之西岡隴崎嶇榛莽深密披叢指奏曰此卽  
著草

上親摘一莖玩其枝幹又採子盈掬辨其氣味曰細嗅  
之亦有異香

上遂親採三株付近侍攜歸又問此大樹爲何木毓圻  
奏曰此皆椽樹

上笑曰本名榦樹乃木傍加斗斛之斛

上瞻眺過午出享殿至階下南面立衍聖公孔毓圻等

叩頭奏謝大學士明珠王熙等跪奏曰

先師孔子道大德隆爲萬世師爲百王法然猶有其  
德而無位我

皇上德位兼隆

心契

聖學

躬備至道作

君作

師以立人極是以尊聖重道典禮隆備度越前古歷代

帝王幸闕里者儀文之盛未有如我

皇上者也臣等遭逢

聖明備員扈從不勝欣忭掌院學士孫在豐侍讀學士

高士奇等跪奏曰

至聖之道昭垂萬世而振興文教實賴

一人

皇上躬詣闕里盛舉儀章正以宣揚

聖化烝育羣生凡有血氣莫不感發誠海內嚮風之自

億載太平之基不獨孔氏子孫感沐

皇恩已也衍聖公孔毓圻等跪奏曰從來臨幸之君但

詣廟庭若幸林則祇有宋真宗已為古來希觀之

事

皇上祀廟之後

臨御林垆酌酒親拜周覽良久咨訪陳蹟愛及草木仰

見

體道之誠尊

聖之至海隅日出無不感慕興起以副

文明之化不獨臣等忝為聖裔感戴

高厚之無涯也

上觀亭前石儀翁仲華表角端文豹

附錄○自林門折而西渡洙水橋有石坊其北卽墓門三間門內列石儀華表二角端二文豹二又名金光獸翁仲二左執笏右帶劍石鼎一皆宋時造宋宣和五年立石儀碑曰孔子舊墓無石儀有司請於朝命工鑄造已成委林外污泥中一日通判襲慶府王衣衍聖公孔端友與廟宅族人同議揆日卜地立於宣聖墳前實雅奉朝廷尊師重道之意也

上於墓門竚立東望問是何所衍聖公孔毓圻奏曰臣家春秋祭掃族姓燕會之所名曰思堂

上入思堂問壁上有何名碑衍聖公孔毓圻奏曰皆宋元題名

上周覽訖在堂中南向坐問曰此林周圍幾許衍聖公孔毓圻奏曰共地十八頃今二千餘年族人日繁祔葬無所

上曰何不開擴毓圻奏曰

皇上垂問及此

聖恩高厚遠逮臣家百世子孫但林外皆版籍民田欲擴不能尚望

皇上特恩賜給

上曰卽具本來毓圻等叩頭謝

恩

上步出思堂升輦出林門卽西發幸兗州府衍聖公孔

毓圻等跪送道左是日申刻

命內務府大臣偕禮部尙書介山等於詩禮堂頒

賜

賜衍聖公孔毓圻五經博士孔毓埏顏懋衡等及曲阜

縣知縣孔興認

日講四書易經書經解義各一部

賜衍聖公孔毓圻狐腋蟒服一領黑貂掛一領表裏各

### 五疋

賜五經博士孔毓埏等曲阜縣知縣孔興認及四氏子

孫在仕籍者蟒服有差

賜孔氏子孫進士舉人貢生袍服有差

賜孔氏子孫監生生員白金各五兩

賜曲阜縣康熙二十四年地丁銀盡行蠲免

先是內閣等衙門

題爲欽奉

上諭事 臣等伏惟

皇上典學右文崇儒重道紹唐虞之治統接洙泗之心

傳

車駕東巡

躬詣闕里致祭

先師祀禮告成所有應行事宜及頒

賜衍聖公等儀物

命臣等集議者謹議得歷代帝王致祀闕里或親製贊

文及四配十哲命宰相等分撰贊詞勒石廟中或

賜書籍銀幣器皿或榜書御筆或加恩孔氏子孫

不等我

皇上至德在躬尊崇

先聖

睿學緝熙

天章炳煥所有

日講四書易經書經解義應行頒

賜衍聖公曲阜縣知縣及四氏博士等竝恭請

御製

先師孔子贊勒碑廟庭或

宸翰刻石或

賜衍聖公

御書至於加

恩賜物出自

聖裁非<sub>臣</sub>等所敢擅議奉

旨日講四書易經書經解義着翰林院預備賚往賜給  
朕所製

先師孔子贊勒石廟中及朕所書字刻石竝賜與衍  
聖公書字俱在內頒發其應作何賞賚之處爾等定  
議具奏欽此欽遵仰見我

皇上文治誕敷

聖澤弘被

躬行至道學契

先師

寵臨禮義之邦

恩及聖賢之胄光生簡冊喜溢簪紳今<sub>臣</sub>等議得衍聖  
公擬

賜狐腋蟒袍一件貂褂一件表裏各五疋曲阜縣知縣  
五經博士孔氏及四氏子孫名列仕籍者擬  
賜羊皮蟒袍各一件蟒綿褂各一件孔氏子孫進士舉  
人貢生擬

賜鑲領袖綿緞袍各一件綿緞褂各一件孔氏子孫監  
生生員擬

賜銀各五兩曲阜鄆縣康熙二十四年地丁銀兩擬  
賜恩免<sub>臣</sub>等未敢擅便謹題請

旨奉

旨依議

附錄○漢高祖自淮南還過魯謁孔廟封九代孫  
孔騰爲奉聖君○光武東巡詣孔子舊宅賜酒肉  
○章帝大會孔氏男子年二十以上者六十三人  
令以儒者巾服見賜孔氏男女錢帛留祭器於廟  
○安帝幸闕里命孔氏宗族榮以衣冠悉會賚帛  
有差○唐高宗詣孔子廟免孔氏子孫賦役○明

皇詣孔子宅詔孔氏子孫並免賦役○周太祖至  
闕里詔留所獻銀酒器及爐於廟中訪孔子四十  
三代孫孔仁玉爲曲阜令○宋真宗謁先聖廟詔  
文宣公伯叔兄弟子姪及孔氏家族長者並許陪  
位以御香一盒竝銀爐祭器皆留於廟賜其家錢  
三十萬帛三百疋

大學士明珠王熙等奏曰<sub>臣</sub>等叨隨

法駕屢奉

綸音仰惟我

皇上纘承洪緒統御萬方

聖駕臨幸闕里釋奠

先師<sub>臣</sub>等四氏子孫赴廟陪祀觀禮

恩賚備至謹奉

表稱

謝者<sub>臣</sub>等誠惶誠恐稽首頓首上言伏以

聲教誕敷虞廷勤省方之駕

文明震耀漢世隆幸宅之儀

玉輅臨而洙水流光

鑾輿降而尼山煥彩曠典幸逢顓蒙罕覩茲蓋伏遇

皇帝陛下

執中布度

得一含真

文武聖神協車書於海澨

寬仁哲惠沛雨露於寰區一統隆無外之規猶

軫民瘼而巡草野萬國仰

同文之治彌尊至道以

御宮牆循過魯詣宅之蹟舉太牢親祀之儀五色彩雲

雙鳳夾爐香而旋繞九天瑞靄六龍護

袞冕以親承隆儀肇舉肅瞻北面之崇雅樂初聞頌習

太常之奏髦士奉璋以景從野老扶藜而觀化一



十四君之駐蹕無此顯懿二千餘載之弘規始為峻極臣等質慚樗櫟學愧箕裘恭迎

法駕於層霄歡呼相慶親近

天顏於咫尺悚惕靡寧膺

御賜之殊榮率賢裔而沾被

聖恩優渥感戴無涯伏願

念典愈勤

宏文日煥

親接羹牆道脈奚止禮樂三千聿開奎壁光華永奠河山百二四海傾誠祝地久天長之福萬邦拭目仰

王馳帝驟之勲臣等無任瞻

天仰

聖激切屏營之至謹奉

表稱

謝以

聞

幸魯盛典卷十終



